

本朝分省人物考

人物考目錄卷之八十五

河南開封府二

張斌

劉安

丘陵

吉慶

張睿

李彬

楊鐸

祝暹

王宇

賈恪

婁良

鄭寧

甄鐸

黃紱

馬文升

辛訪

和維

李敏

王豫

呂益

李璵

李英

柴廣

傅皓

袁江

傅允

李愚

李維聰

黃傑

王繼

高崧

李景繁

楊謚

楚麟

本朝分省人物考卷之八十五

河南開封府二

張斌

張斌字執中祥符人也幼醇篤嗜學中宣德己酉鄉
舉明年庚戌會試乙榜授陝西鞏昌教諭端嚴範士
正統己未九載秩滿給由銓部選送行在都察院理
刑甫半朞考中庚申欽授行在浙江道御史以母喪
守制還汴服闋改除雲南道御史己巳冬勅往密雲
協贊軍務景泰壬申九載秩滿例當代而邊事孔殷
時鎮守密雲古北口迤西等處署都指揮僉事張興

等奏稱御史斌久理關塞備禦有策獄訟公平軍民倚賴遇警督兵截殺累立戰功乞留斌仍在密雲整理邊事制下銓部稽例議覆部擬陞正六品協贊軍務如故待事寧回京不次擢用上允之天順戊寅冬召還朝命鄒來學代尋擢福建布政司左參政成化丙戌傳旨令羣臣各舉所知於是尚書等官首推斌遂擢本司右布政使己丑轉左布政使適在關下以右布政使入賀明年庚寅抵任時年六十五矣乃鑒止足之義引年乞骸骨歸而巡撫福建都御史滕公固留之請之彌堅浩然還汴與里居諸耆俊

爲嘉樂會優游林壑考終於家

劉安

劉安字元靜世爲大梁人少勵志節苦志誦讀朋輩咸退遜以爲不可及登永樂癸卯鄉舉宣德庚戌春會試南省中乙榜授山東金鄉縣學訓導勤於誨士部使者薦之擢山東道御史慨然以功業自期明憲綱究律令劾姦洗冤振揚風紀事有難處都御史舉以屬之無弗竟者嘗奉命巡按南北京畿風裁峻整在道九載擢山東按察司副使用法平恕恒存欽恤之意至遇渠惡巨猾爲民厲者不少假貸由是吏

良民懷聲稱藉甚逾三載丁內艱還汴天順戊寅服闋復除陝西按察司副使應詔陳時務三策一曰從祀謂我朝開國以來養士百年豈無真儒可續道統之傳請勅禮官推訪著書立言扶翊聖道者列諸從祀以風厲來學二曰軍務謂邊方軍士衝冒風雪不勝寒苦合議罪犯收贖照例米粟革襖兼納頒給軍士以禦飢凍三曰水利謂濟寧上下凡有泉源去處宜疏通入河以濟舟楫 英廟可其奏次第行之甲申年踰六十懇乞骸骨歸與汴中二三者舊詩酒倡酬以樂太平壽九十餘歲歸田時囊無餘貲惟舊屋

一區弗蔽風雨敝衣糲食出不能具驢車清修好古
晚歲嘗采輯古今詩文之粹者若干篇分爲六卷題
之曰資蒙寘諸家塾以垂訓子孫

丘陵

丘陵字志高蘭陽人也宣德四年舉鄉試第一明年
授咸陽教諭遷平鄉知縣凡所施設不憚勞苦邑有
漳水暴悍衝決數爲民害地卑且無城郭陵築城又
築長堤數十里以障水民得播種復植雜樹以固堤
基土木之變民恃以無恐至今日其堤爲丘公堤云
山西歲飢流民入境陵拊循之給以閑田使食其力

民歸之者千餘戶先是廟學傾圮陵撤而新之又爲諸生嚴立課程時加考閱其俊偉者則別館之日給薪米膏燭以勗其成邑之鄉社十二亦各立學擇師以教之於是絃誦之聲達于閭里在邑數年諸廢皆舉值家艱歸民攀留不得乃預計服闋之日詣闕請復任從之又數年景皇卽位以廷臣薦擢淮安知府天順四年陵入覲以政績卓異特賜錦衣寶鏹仍命張宴禮部以示褒勸累擢山西左布政使成化初李秉爲吏部尚書執法不同學士彭華從子求京秩不得憾秉嗾同鄉給事中蕭彥莊誣劾陵坐逮乃上

疏奏辯事白彥莊免官陵亦致仕後二十年卒

吉慶

吉慶滎陽人宣德己酉舉于鄉授莊平知縣躬臨畝
畝教民樹藝不事苛察民甚親之擢監察御史無何
謫戍遼東以功陞副千戶天順中改知均州奉勅
撫治鄖陽光化白河褒城流民全活甚衆加三品俸
以褒之

張睿

張睿字志通鄆陵人宣德庚戌進士授吏科給事中
歷遷戶部左侍郎總督糧儲正統己巳之變睿督軍

守城朝廷恐通儲資虜詔焚之睿審時度勢矯 旨
存糧芻以億萬計天順中禮部尚書石瑄求退 上
諭李文達曰若張睿可以代之文達亦稱其老成堪
任會瑄仍留 上乃降特旨陞睿戶部尚書仍管糧
儲事 命下士論美之

李 彬

李彬字以中祥符人性峭直疾惡甚嚴持論慷慨恥
浮沈詭隨永樂癸卯領河南南鄉薦宣德庚戌登進士
甲寅授行在山西道御史正統戊午 命按兩淮鹽
法陞辭上疏謂淮南醯利寔甲天下其部轉運司正

佐官監守財賄責任匪輕宜選廉正之士爲之臣茲
行多方詢察有貪黷實跡者必劾罷之乞 勅銓曹
此後除補務求佳士往充其員果有清節著聞一體
擢用則人不厭此官而鹺政修舉矣 上從之由是
諸鹺吏自度不爲所容者咸望風解印綬去壬戌
勅清戎山西單車入晉移檄軍司嚴禁本官尅削影
射充役私門不隸行伍自首者宥隱蔽不悛者罰由
是軍旅填實癸亥丁內艱守制還丙寅服闋補浙江
道監察御史戊辰改山東僉事三載當考績適巡按
御史闕員 廷議借留代巡按御史決囚壬申懇乞

致仕歸戊子卒年七十有三嘗自言曰吾自筮仕以來皆典憲臬謬以平反寃獄振厲風節爲已任居官二十年未嘗有枉于法者此心可以對天日云

楊鐸

楊鐸字文振原武人宣德壬子中鄉試魁次年登進士正統元年奉勅前往陝西纂修 宣宗皇帝實錄 次年三月除授大理寺左評事詳獻平恕公勤之譽 茂著當時正統乙丑陞授陝西僉事時遇按察使政尚寬平奸宄之徒肆爲佞辭皆得疎放鐸必法言以正之由是輿論稱快聲價益著景泰甲戌復陞陝西

右參政督延綏甘肅等處軍儲益勤於蒞政邊事以
寧軍民悅服天順壬午丁內艱服闋復除貴州參政
通前九年滿考夷獠不捨其去合疏保留加從二品
俸照舊管事成化丁亥丁外艱還鄉聞友人宋克新
謫官東阿與妻子俱喪不能歸葬乃出備路貲遣人
自東阿取三喪歸葬之鄉人稱頌其德服闋復除雲
南左參政蒞任未幾引年乞致仕還僑寓汲城日與
士大夫優游詩酒鄉社之間歌詠吟嘯以上壽考終
于家

祝暹

祝暹字孟昭祥符人生而秀異好學弗倦領永樂癸卯鄉薦宣德癸丑登進士第正統改元拜戶部主事時酋虜朵兒只伯寇西寧朝廷遣將擊之廷臣薦其材略可任特命督理糧運處置有方餉弗告匱只伯就擒暹之功居多未幾父歿守制還汴旣免喪補工部主事居無何復調刑部明刑慎獄多所平反聲稱籍甚九載考績擢郎中戊辰閩寇鄧茂七作亂攻陷城邑勢甚猖獗朝議洵洵命大司寇金公濂統率大軍刻期會剿命暹綜理軍務隨師以行料敵制勝多所裨益明年斬茂七傳首闕下論功行賞擢都察院

右僉都御史理院事適北虜也先犯京師 景皇帝
卽位念保定等府爲畿輔要地勅暹往守其城畫策
防守士民皆安堵如故會虜遁去 上賜白金彩幣
以旌嘉之壬申 英廟復辟甚加眷注而時以疾在
告召還京師就醫調攝竟不起年五十有八 上聞
訃震悼遣官諭祭造坐城皆異數也暹位不滿德用
不盡才君子惜之

王 宇

王宇字仲宏祥符人童稚時從師受業日記萬言巡
撫重臣一見而奇之曰此大器也正統戊午魁鄉解

明年登進士第授南京戶部主事管理糧儲痛革宿弊廉能之聲大振在郎署中特立獨行不隨流俗陞江西撫州知府郡地險民夥素號難治至則以簡靜御之六事畢舉里有隱士吳與弼不妄至城府往造其廬與弼聞之卽先謁拜談論竟日出嘆曰真明府也宇益勞心民事凡有宿弊盡革罷之撫民多商紉繻之錢歲計累萬守皆自取宇曰可以無取而取之是傷廉也悉屬於官郡治有穴地前守引水蓄魚以自給遂實之爲倉儲穀數萬石以濟饑民郡人題其壁曰關節一毫無地入公廉兩字有天知遠邇傳誦

金谿有聚衆暴掠者宇曰此吾良民迫于飢餒故耳
卽開倉濟之衆皆感泣曰真吾父母也卽時散去巡
撫上其治行于朝特賜誥命以旌異之天順改元重
方岳之選屬廷臣會舉堪任者遂擢宇山東右布政
使時廷議山東累歲不登民皆流移詔宇撫安之宇
盡心設法賑濟不憚驅馳民賴全活者數十萬人明
年擢左副都御史巡撫宣府等處至則洗刷積弊力
振戎務一切便宜處之革弊除奸士卒感慕未幾大
同缺巡撫復屬兼之時石亨與其侄彪皆驟遷高爵
恃寵自肆而大同乃舊鎮之地索取尤橫衆莫敢櫻

獨上書劾之詞氣剴切聞者嘆服已而亨彪果以奸
敗 朝廷益嘉其忠直庚辰丁內艱還家守制未終
詔起至京拜大理寺卿累章乞終制弗許在任惟
以洗冤澤物爲先精研獄狀務得其情凡平反甚衆
七年癸未以疾終於家

賈恪

賈恪字惟恭別號林居子通許人也自幼穎敏越人
刻意問學雖嚴冬盛暑手不釋卷正統戊午領河南
鄉試第二明年登進士第授行人將命四方人皆偉
其才丙寅選授陝西道御史丁卯刷山西文卷自三

司以及郡縣凡匿卷者皆被劾治罪官吏懾服已已
勅理浙江銀課時處州寇發嚴設備禦民賴以安尋
奉命巡按浙江薦廉能鋤奸頑洗冤澤物克張其職
辛未丁內外艱服除巡按宣府興屯田練軍旅凡安
邊之事皆悉心力爲之不懈旣代歸適 英廟復位
慎選老成分任方岳 命京職各舉所知以許襄敏
公彬薦擢山東布政司右叅議召至 便殿宣諭德
意賜寶鏹千貫爲道里費恪懷惕厲以求報稱戊寅
兼理遼陽邊餉癸未督修闕里孔廟具有成績先是
按宣府時曾劾奏僉都御史李公秉由是有隙成化

丙戌秩將滿會秉當銓曹考察遂坐以不謹放歸田里或爲不平恪笑曰行藏有命何係於彼乃浩然歸汴與鄉耆結社賦詩爲樂夏則往遊通許別墅避炎敲棋優游林下者十餘年乙未八月卒年六十八

婁良

婁良字至善通許人少與賈恪齊名故諺曰婁良賈恪氣如山嶽登正統壬戌進士授刑部主事己巳之變留虜庭虜酋脇以威至刃其胸終不屈虜重其節釋之還遷員外郎中出爲廣西參政改陝西天順中以平西寇功賜璽書褒獎遂命總督糧儲兼理屯田

有專勅其制自良始成化中歷左右布政使陞右副都御史巡撫甘肅致仕歸橐中惟圖書數卷居宅湫隘都御史趙公欲爲建一寢室良辭不受趙不能強

鄭寧

鄭寧字志道別號靜齋世爲祥符人正統辛酉舉於鄉明年壬戌登進士授刑部主事歷本部員外郎中在刑部十六年精於法比諸寮遜服直隸崑山周氏武斷不法事聞奉勅往勘周托一京職懷金夜饋置牀榻間速出寧追而還之曰勘問自有公道何庸賂爲其人慙謝竟寘於法壬申以外艱還汴有邏卒獲

鄰人爲盜者賊咸曰此鄭郎中家物歸之不受曰物有相似毋相誣也甲戌服闋復除刑部郎中奉勅清理南畿冤獄讞辨平反曲當情理用是譽望益著天順改元丁丑選郎署才望老成者出任方面被薦超遷四川右布政使入蜀適劇盜趙鐸嘯聚倡亂設計擒滅之撫臣以聞上賜綵幣一襲以示嘉獎戊寅入賀事竣還任有唐千戶者妖言惑衆逃避深山中爲咎自固撫臣徵兵議勦寧曰此愚民耳可不煩兵而解乃屏去兵衛單騎入咎諭以禍福千戶感泣請縛不假兵力而地方以寧嘗以公事連坐或信之

笑曰此公罪也吾輩公罪不可無私罪不可有人以爲名言成化丙戌同保國公朱永征勦五和尚等功成受白金綵幣之賜丁亥九載考績擢太僕寺卿食從二品祿戊子改都察院左僉都御史巡撫宣府時盛暑築城保工役數千人天久旱有司祈禱莫應曰此勞民弗息之徵也乃下令罷工是夕天大雨穡事有秋邊人胥悅辛卯丁內艱復歸汴蒙遣官諭祭葬厝甫畢詔奪情起復仍舊職固請終制不允再至鎮軍民咸迎拜喜曰我公來矣逾期移鎮大同在邊鎮數年適疆場無事幕府多暇日延見境內士大夫咨

詢民瘼次第舉行甲午以疾乞骸骨不許凡三上疏始得請其歸也囊無餘貲居閑十四年服食澹泊數至匱乏丁未詔在京五品以上官以禮致仕廉貧不能自養者有司歲給食米四石弘治戊申四月卒寧質直謹愿雖貴顯接遇鄉人殊優厚故鄉人多稱之

甄鐸

甄鐸字文振祥符人也性剛方雅尚志操正統丁卯貢禮部卒業太學景泰丙子授保定府定興縣令定興密邇京輦號難治下車剪鋤頑兇撫慰良弱節縮浮費不逾年政令大行無敢梗撓者定興邑小路衝

先是走遞馬匹及櫃杠什物堆垛槩縣民力疲弊農
畝日荒而遞運不前鐸立法編定牌甲班次分番走
遞合用櫃杠弗泛給由是民力寬舒農種不廢邑中
有一二黠豪賕結京要官爲親識素與邑長抗禮相
往來通餽遺邑長皆折節下之鐸峻拒裁抑有犯則
繩以法不少假以辭色黠豪怒大肆詆誹煽構成獄
定輿民無男婦長少及籍戎京衛者殆千人咸伏
闕聲其冤乃准行勘使者密受風旨以威嚴臨之設
炮烙於庭欲其誣服鐸神色自若不爲之動使者隱
几假寐惚見公服僕頭者厲聲曰甄知縣好官汝宜

存公道使者寤大驚乃虚心鞠審事遂白詔調它邑
民又騰章上請乞留治定興從之而代者已至適聞
父喪守制還汴服闋補文安乃分上中下三等躬親
察驗弗憑里胥言賦役均平固有怨憾又教民植桑
棗差其勤怠行賞罰今蓊鬱成林父老指示幼者曰
此甄公桑也此甄公棗也其遺思在民如此秩滿改
三河成化甲午引年乞骸骨歸得請卽戒行不終日
囊橐蕭然至無以代步民涕泣攀送不可留因相率
各出徵贖市一馬擁騎以歸強從之曰吾抵汴卽遣
還民或有未信者旣至汴卽遣馬歸父老見至咸嘆

服以爲近代未有也丁未七月卒得年七十八

黃紱

黃紱字用章封丘人正統戊辰進士初授南京刑部主事歷員外郎廉明峻執遇事颯發智巧所避毅然肩之人竊笑其呆咸以硬黃目之有譚千戶者大狷任俠結懽貴人奪民蘆田萬畝貴人業與飲食往來卽知民枉不能直紱盡法直之蘆田歸民久之擢四川叅議督松茂軍餉劾治將領侵冒擒諸倚勢豪肆邊上者陞本省叅政過崇慶忽旋風起輿前擁不得行紱曰卽有冤且散吾爲若理風遂止抵州沐而禱

城隍夢中若有神言州西寺云因密訪州西四十里
有寺當孔道倚山爲巢旦起率吏兵急抵寺盡繫諸
僧一人少而狀惡詰之無祠牒印塗醋聖額上曬洗
之隱有巾痕紱曰是盜也卽訊諸僧不能隱盡得奸
狀蓋寺西有巨塘夜深投宿人殺之沈塘中衆分其
囊有妻女則分其妻女匿妻女隱窖中恣淫毒久矣
蓋按律殺僧毀其寺倉吏倚王親侵沒官糧萬計王
曲庇倉吏竟按如法紱精于律比輒能發摘奸伏威
行川中神令聞風解綬走轉右布政使奏閉建昌
礦爲左使時湖廣妖僧繼曉所至勢焰薰人紱曰繼

曉以妖術故不離上左右今且得罪避出名掃墓實
逸賊檄武昌府館之後堂好飲食之無令得出入俄
事敗檻送京師伏誅陞右都御史巡撫延綏劾叅將
郭鏞都指揮鄭印等葭州史知州等計捕豪奸張綱
等拔才能察幽隱問疾苦飭廢墜申號令修器械嚴
警邏節候望邊政爲新偶行道上見川中飲馬婦片
布遮其下體乃曰嗟乎健兒貧至此乃驅之戰守耶
令預支米三月會 詔毀庵寺使汰尼解軍門給配
鰥軍人大悅無不願爲黃都堂死者比去咸携子
女拜送路傍已爲南京戶部尚書益無所顧避威稜

截然江浙食鹽錢鈔民苦包攬掎勒力條其折徵銀
狀以聞至今行之便 特旨改掌憲院至則嚴甄御
史量能委之火其差簿於庭曰事貴得人耳資勞久
近豈立官意哉天下方仰望風采自以歷事五朝中
外幾五十年慙直崖異動輒忤人伏禍難測又盛滿
宜戒乃引年乞骸骨居無幾疾作以弘治甲申年卒

馬文升

馬文升字負圖開封府人幼讀書卽了大義景泰辛
未登進士授監察御史巡按山西湖廣所至有聲天
下未幾未陞福建按察使憤鎮守中官擾民輒繩以法

民戴其德歌謠載路成化乙酉陞南京大理寺卿未
幾以憂去服未闋值固原土夷滿四倡亂邊陲告急
特起爲右副都御史巡撫陝西俾與都御史項忠總
兵官劉玉會兵討之生擒滿四俘獲男婦無算捷聞
賜勅獎勞陞左副都御史時流賊蠡起聚衆刼掠殺
敵官軍其鋒銳甚文升悉以計剪除之壬辰虜寇臨
鞏文升督兵追至黑水口生擒平章鉄烈孫斬首數
十級遂陳時政十五事及禦邊三策尋命節制三
邊秋九月北虜寇韋州深入固原及好水川文升檄
召諸路按兵伏湯羊嶺虜至遇伏驚遯盡棄輜重擒

斬二百餘名級捷聞有白金文綺之賜因改其嶺爲
得勝坡勒石紀功又剿平氓州叛番厥績尤茂乙未
召爲兵部右侍郎適遼東有警 上以文升諳練戎
務俾往備之文升制五花營八陣圖以訓士卒復上
禦邊十五事皆切時宜虜患遂平陞左侍郎食二品
俸戊戌建州女直復叛巡撫都御史陳鉞欲誘殺進
貢夷屬以掩已過由是夷益惧爲亂 上命文升再
往時太監汪直恃寵倖功陰主鉞議邀文升偕行文
升弗聽先蒞其地招撫黑鎖忒等二百餘名比直至
虜已解散直無所獲深銜之乙亥言官劾總兵官歐

信韓斌及鉞激變事情逮繫至京鉞厚賂直傾之文
升一無所辨遂謫戍重慶日與蜀士考德問業若未
嘗貴顯者直敗文升寃始雪詔復其官俾致仕甲辰
起爲左副都御史巡撫遼東禁轄科害人無敢犯文
升於遼東至是凡三往皆樹奇績東人至今思之乙
巳陞右都御史督理漕運兼巡撫鳳陽等處搜剔宿
弊剗革無遺未幾陞兵部尚書適貴州都勻黑苗弗
靖守臣請發雲南四川湖廣兵征勦文升持不可奏
差郎中御史各一員往彼處勘果無他虞尋改南京
兵部尚書參贊機務弘治改元召爲左都御史命掌

院事陞見召至文華殿賜大紅織金衣一襲 上在東宮時素知其名文升感殊遇益自奮勵知無不言上特倚重焉二月 上耕籍田文升與行推禮時教坊司以雜戲承應或至狎文升厲色曰 新天子當知稼穡艱難豈宜以此瀆亂 宸聰卽斥去二御史以糾儀下獄文升謂卽位之初不宜輒罪言官於是得釋時論韙之三月 上初御經筵賜賚甚厚乃上言十五事曰選賢能以任風憲禁摭拾以戒賍貪擇人才以典刑獄責成效以革奸弊擇守令以固邦本恤士人以防後患清僧道以杜遊食敦懷柔以安四

夷節費用以甦民困悉見施行未幾復改兵部尚書
提督京營軍務七月京城大雨爲患疏時政得失十
事以弭災變占城國爲安南所侵遣使請救衆議未
決文升卽會禮部拘朝貢使臣諭以禍福俾還侵
地遂通好如故辛亥二月丁繼母憂上以邊方多
事手詔起復懇乞終制不允乃出視事建州夷伏加
謀叛械繫京師下法司鞫問巧辨不服文升徐以數
言發其奸伏加始惶懼請罪遂竄南海貴州苗叛議
遣鎮遠侯顧溥率兵往擊之且授以方略克五十餘
寨俘男女數百餘口而還自是震懾九月加太子太

保九年疏乞內外衙門各舉將材其操習規矩遵依
洪武永樂年操法不許頻換奏 上嘉納行之以年

七十乞致仕 上慰留之戊午春二月 皇太子出

閣加太保兼太子太傅疏謂 皇太子國之儲貳天

下根本宜擇老成純謹之士以資啓沃不宜雜以浮
薄之流恐虧損盛德 上欣納之十一月清寧宮災

勅兵部議處文升言天下軍民疲苦乞發內帑銀

兩及停止四川採木之擾 上深以爲然卽從其議

落成有蟒衣白金之賜官其子琇爲錦衣百戶虜酋

火篩擁衆寇大同威遠勢甚猖獗京師戒嚴 上親

灑宸翰賜上膳品具召至 內便殿咨以戰守之策
文升因舉保國公朱暉等整搦官軍以待且令各邊
謹斥堠豫戰具虜知有備卽遠避去壬戌轉吏部尚
書 命下朝野胥慶進少師兼太子太師明年史夫
人卒 上遣官諭祭爲營葬事乙丑考察大朝官員
斥去不職者二千餘員人無異議五月 孝宗上賓
文升哀慟甚至正德改元凡大典禮文升復參預其
間御用監太監王端以大婚禮欲用儒士七人篆刻
番字文升方杜塞倖門堅執不從給事中安奎以爲
宜聽文升言若墮其奸計則大臣垂首喪氣直道何

伸非國家之利端慚憤誣文升抗拒賴諸大臣力爲
之辨其冤始白文升遂求去封章累上前後二十一
疏陛辭賜宴及 璽書褒美仍給寶鑑爲道里費旣
歸足迹不至城府屏居三峰山董村之別墅乃更號
三峰居士扁其堂曰樂農始終好學至老不釋著有
約齋集及奏議三事紀行於世卒年八十九贈太師
謚端肅

辛訪

辛訪字咨道襄城人景泰辛未進士授監察御史陞
浙江按察司僉事會處州頑民聚眾盜礦眾議發兵

討之訪曰兵興必有歿於非辜者先出榜諭以禍福衆皆散去桐江有大姓連姻權貴怙勢恣橫有司莫敢誰何訪獨捕治之竟抵於法遷福建按察副使奸民屏息未幾以憂歸卒于家

和維

和維字振綱河陰人登景泰辛未進士拜刑部主事五年擢浙江按察司僉事召至便殿賜宴又賜寶鏹千貫以行時藩臬吏多私養馬卒雖妻妾巾襪襦履絲絮悉養馬卒出不法稱是維遂發以聞上覽奏悉按諸不法者坐之由是構隙卒爲所讒會父憂

歸得免前是浙販絲民有值劫者亾其刀獨鞘在權
貴者遂誣機戶姜魯等行劫殊無左驗維力爭不聽
出召販者問曰若絲何驗曰囊上印廣昌郡字於是
密遣邏旁邑至海寧插秧人禪上隱隱有字也執訊
之具服詰刀所在曰在新官橋下取驗之實販者所
亾刀權貴人大慚又嘗江行聞哭聲蓋寡婦兒爲人
所掠賣也立廉致還之性善酒及徙大梁日與郡中
諸豪傑往還輒飲飲輒醉所著書并詩數十百卷行
於世

李敏

李敏字公勉襄城人景泰甲戌進士授監察御史天
順丁丑貴州蠻賊嘯聚命往撫捕之比還出按畿內
力革宿弊軍民戴之累陞浙江湖廣按察使山西四
川左右布政使成化十三年入爲都察院右副都御
史奉勅巡撫大同兼理軍務先時虜俟守墩軍下
取水輒肆戕害敏至設伏擒之自是虜不敢犯山東
河南運邊糧者歲數萬石更涉險遠率倍費始得達
敏計歲會外令易銀給將士以其餘市戰馬治軍裝
至今以爲常成化十五年召爲兵部右侍郎與余子
俊各以身許國知無不言言無不從及陳鉞附汪直

氣焰可畏敏以正自律並無徙倚十九年以疾乞歸
二十二年適河南大饑疏採荒數事封上因召改左
副都御史巡撫保定等府兼提督紫荆等關二十三
年改總督漕運巡撫鳳陽等處尋擢戶部尚書時天
下頻歲水旱所司往往乞免田租其章奏敏皆手自
叅決大要以足國安民爲急上嗣位例行賞賚而
邊境更以儲峙缺乏爲奏敏區畫有方用以不乏嘗
言鹽課爲國用所資比歲法壞宜簡命風憲大臣理
之詔如其議畿內有隙地貴戚初乞不與而以與民
後復有欲得者敏言令不可變恩不可偏其仍與民

爲便奏上從之時又有乞鷹房牧馬場千頃者敏言
場止二百頃餘皆民產業安得奪耕種之地以爲飛
放之所亦從之京師大水有 詔令百官各陳時政
闕失敏所疏數事皆人所不敢言者至他建白尚多
不能盡述在戶部五年以疾上疏得休致歸至內黃
疾革謂從事曰吾以一介書生祿位至此愧負無地
方圖報稱而年力不能如 朝廷大恩何言訖遂卒
贈太子少保謚恭靖敏爲人和易明爽臨事慎重有
大議草奏動輒數千言理明辭順見者推服平生多
厚德遇貧乏者輒施與不吝處諸兄能友愛數以所

賜金分遺少感其師顧昌之教歲時問遺不絕嘗欲分俸以養事雖不行然士大夫多之

王 豫

王豫字用誠祥符人生數歲父母相繼亡爲世父所鍾愛稍長嗜學不厭游邑校以才俊稱試當廩食再讓諸同儕之窘匱者監司賢之景泰庚午舉於鄉甲戌成進士乙亥拜禮科給事中立朝蹇諤持大體不爲矯激之行天順丁丑 英廟復辟益開言路感激論事章疏最多顧不留稿以故世鮮有知者是歲冊封天下諸王詣楚府爲輔行餽贐一無所受當時贈

詩有操守一廉清似水之句人以爲實錄庚辰殿試
充掌卷官辛巳安南國王黎濬請封偕通政司參議
尹公旻往道經廣西聞濬內難乃飛騎上聞取進止
詔令還朝後國人奉濬弟灝當立復表請 上仍命
偕翰林學士錢公溥持節往封至其境乃與錢公議
曰蠢茲蠻夷僨悍無禮弗諭遽入或有忤如辱命何
乃移書論辨至五六既格服始入其國灝俯伏就位
無敢異事竣餽贖甚腆峻却之甲申擢湖廣右參議
奉勅提督太嶽太和山觀兼節制均襄軍民事操守
益勵威惠並施事神理民精白無貳成化乙酉連歲

大侵悉心賑拯無遺策存活者甚衆有劉千斤者嘯
 聚剽掠荆襄間王師征之被薦督餉時賊勢孔熾道
 梗塞轉輸不乏賊旣平受勅褒諭時有諷豫以子窳
 籍伍中微爵賞者笑曰饗功倖祿爲子孫圖非吾志
 也已而上言鄖襄逋寇淵藪今雖平靖尚虞有後變
 命與鎮守等官計議斟酌施行在鄖襄卅年律已愛
 民廉惠如一日凡奉璽書十有三雖事與中貴偕然
 心公而直中貴亦知重之無所沮撓甲午秩滿軍民
 保留乞再任從之賜食三品祿尋解印綬去去之日
 囊橐蕭然歸逾七年卒壽六十三

呂益

呂益字伯謙別號梅菴世爲祥符人性資闊達學冠羣士正統丁卯領鄉薦景泰甲戌登進士乙亥授陝西道御史是歲九月昌平侯楊俊爲家人楊榮所奏穢迹旣著於是刑科都給事中王鎮等浙江道御史費廣等會劾之詔下都察院鞫問都御史蕭公維貞乃以其事屬益竟抵俊於法十月奉勅印烙直隸鳳陽等府馬匹時廬州府無爲州等處連歲旱蝗虧損馬三千九百餘匹小民窮困弗能償上疏于朝得爲蠲免天順丁丑巡按廣東時都察院右都御史耿

公九疇欽天監掌監事禮部右侍郎湯序各奏稱在外大小問刑衙門見監輕重罪囚或有冤滯上千天和行移巡按御史會同三司官逐一審錄有可矜疑者具奏末減益星輶徧歷夙夜清審多所平反而廉欽化州等處蠻寇猖獗攻掠城邑荼毒生民會同鎮守總兵督兵進剿身親矢石掃平巢穴已卯得代回京勅往直隸通州直抵山東東昌府緝捕寇盜地方寧謚還朝庚辰石亨姪婿大同都指揮使廖傑不法事聞朝議行巡撫都御史王公宇勘問適宇議事回京患背疽未愈被薦代宇往問傑伏辜六月勅在京

巡視九門并提督北城辛巳提督通州糧儲并巡視
李家庄等處草場壬午督捕真保定大名等府寇盜
癸未巡按隆慶州并大同宣府二鎮甲申改陝西按
察司僉事成化丙戌解官歸居鄉三十餘年謝絕人
事不輕至公門惟慶賀聖節長至元旦暨郡大夫敦
請鄉飲則一出杜門省愆安貧俟命年八十卒蒞官
十二年任事敢爲不避險艱人多以慙目之竟以慙
獲咎免官

李 璵

李璵字廷瑞祥符人景泰甲戌登進士授戶部主事

勅權濟寧州課甫期積額外羨餘數萬兩盡輸之官
不以一毫私已由是廉聲茂著遷員外郎復奉命

稽察畿內諸郡縣府藏所至先封其倉庫按籍覈之
典守者弗得彌縫旋補盡得其侵漁虛耗之狀參劾
罷黜若干人未幾轉郎中無何墜馬傷足躅于步履
朝參弗便時少宰雅重之且念其守官苦節家業未
立乃以其故言於部家宰遂擢長蘆鹽運使寔欲其
循常例爲自腴計聞之笑曰非吾志也旣抵任嚴立
條格分毫無所取其應得俸金恒寄予宗族爲婚喪
費又周濟閭里親故之貧乏者及致仕還篋笥無長

物惟故人某贈赤壁圖一副已耳既歸田廬弗增益
尺寸貧不能糊口以訓課里中童蒙爲業配宜人王
晝夜績紡不輟終身無怨言林居二十年貧益甚每
出行徒步不能具巾車藩臬諸公按部屬邑輒枉駕
數十里造謁璵不能備醪饌款留坐久惟再茗而已

李英

李英字士奇祥符人自幼聰敏力學中景泰丙子鄉
試丁丑會試乙榜弗就庚辰授陝西鳳翔府學訓導
立教嚴勤士類有造而寶雞亦以攝教爲得師間委
攝別邑輒以政聞成化庚寅九載秩滿擢尹山東之

昌邑壬辰丁內艱服闋時都御史馬文升撫治陝西
薦知朝邑至則樹良法刻夙弊嚴門禁庶政修舉無
私謁者丙申例考三載滿擢知涇州朝邑之人立去
思碑尋丁父艱服闋改知徽州都御史鄭公時以英
賢能廉幹上言調知乾州路當衝要迎送無虛日竟
以勞瘁成疾卒於官時年五十四先是朝邑溥濟里
民薛旺殺死薛美逮及呂興同罪英曰因姦殺人惟
恐人知呂興何預細審之果然由是呂興得釋遂圖
其像舉族奉祀焉成化丁酉歲早春夏不雨齋戒禱
於城隍不三日而甘雨降歲大稔前黃河泛漲滄沒

東河米至城濠城幾陷沒設法賑濟築堤捍水鹹地
淤爲沃壤水退民爭之紛紛莫定英親詣畝地驗冊
分撥強不得以侵弱又修建朝邑城池學校壇壝官
署倉庾五六百間以漸而成民不知勞

柴廣

柴廣字文博祥符人也少游開封郡學誠寔不苟與
朋友約風雨必踐每遇文廟春秋丁祀必易服齋戒
以往景泰間貢入太學始仕四川酆都縣知縣廉介
有守遇歲大旱禱於神曰此令之不德所致乃省己
過理冤獄不三日甘澍霑足先是邑無城池嘆曰城

池所以衛民也茲役非令得已於是申請上司役民興工平地則築牆山岡則栽樹城郭完整是時士民趙鐸嘯聚倡亂勢甚猖獗率邑中壯勇之士以身先之遂擒首惡地方底寧以薦擢知漢州修學校建輿梁均賦役政績著聞亾何乃引年乞致仕而鄆都漢州俱立去思碑旣歸築室陳橋北日誦內典施藥濟人埋枯骨飼幽鳥凡鄉人婚喪不能舉者倡率鄉之仗義者共爲津助鰥居五十餘年室無婢妾弘治初巡撫都御史海虞徐公恪奏請旌表以勵薄俗壽九十七歲卒於家

傅皓

傅皓字孔暘別號暘坡居士祥符人也天性篤實外和內剛少苦學夜誦徹旦舉景泰丙子鄉試第二人上春官不第卒業成均成化辛卯授通州同知寬厚平易得吏民心在任八年民惟恐擢去戊戌通州守缺員百姓老稚千餘人叩闕上章乞擢皓爲守會使者交薦銓部稽其勞績又當遷遂擢通州知州通州密邇京師寔水陸輻輳之地勲戚宦寺田莊居太半素號難治一切裁以法凡驛遞船馬饋遺非度者悉寢不行諸權貴干索弗遂銜之然竟亦不能害也

隣郡邑有冤獄弗白者咸赴愬使者願下聽斷一屬
訊決輒服嘗上疏論戶口食鹽民鈔歲輸官鹽無給
不報因通融里甲立取鹽法後踵行之不廢有清軍
御史者按郡捕得逃伍者親識卽繫之獄遣行以代
嘆曰無罪而代戍豈制邪緩之令以情奏竟免爲守
十二年考績改知濟寧州通民泣送數十里攀戀不
忍捨去濟寧亦衝郡政務繁劇守濟寧三年節財愛
民惠政懋著癸丑年六十三請老歸汴又七年己未
卒前後典州郡二十三年清慎無間終始

袁江

袁江字自岷祥符人自少資性超異讀書過目輒成誦不忘弱冠落筆有警語年十九領天順壬午鄉薦時東平梁御史覲巡按河南寔監臨鄉試有劉僉事瑄者與梁有隙疑江年甚少而一舉輒第暨同榜祥符人唐昭杜明皆指爲梁所私併劾之英廟覽奏勅法司提解御史覲僉事瑄舉人江昭明俱械繫至京下館閣復試咸入格得釋乃罪瑄誣奏覲復職江等舉人如故明年癸未春二月入南宮試適文場火詔改秋八月會試成進士年二十一始聘左布政丘公陵之女爲配初授戶部主事監督徐州倉糧出納

嚴慎時有中貴人倚勢乾沒奏黜之自是後無敢肆
者成化辛丑母安人歿守制歸居足跡不至城府督
學僉事吳公伯通數命駕往造翌日始還服闋擢兩
淮鹽運使規畫課程次第疾徐一以至公行之貴戚
斂迹商竈咸稱快焉運司有同知王某者出納弗度
移書戒之王慙謝自新卒免困躓丙午冬入覲戒行
白塌河巡檢某以黃金實酒瓶中餽陽曰此秘方藥
酒也可却病延年笞而遣之巨商劉武錦衣舍餘也
暮夜懷黃金二錠爲贖叩首畢拋金速出追還叱却
之弘治更元被薦擢四川右叅政督理糧儲簡書嚴

蘇兼程之任既抵蜀巡行郡邑無少休息滌祛奸弊殫厥心力未歲餘察出隱蔽官賦及夙逋在民者若干萬督屬徵完盡解戶部大司徒題奏旌獎以風勵天下之職餉者驅馳勞瘁疾作或有勸其自逸者曰某既受上知敢復愛其身乎未幾疾大作竟卒于官得年五十爲人坦夷無物以清慎自將歷官三十年典司財賦無所點污顧年僅下壽用不究才人咸悲之云

傅允

傅允字克誠儀封人天順甲申進士授刑部主事常

求情於法之外及罪定雖權貴莫之能奪居官無
馬時從民間僱驟乘之於是訟者輒祝曰得乘驟
決之則幸矣會浙中盜張信竊發銀礦以允爲浙
叅政督察其事信與守門者通以五千金默置允
內乞勿問允發其事且偵得與信通者抵法乃捕
竝其黨四十餘人誅之積患以平改四川右叅政

李愚

李愚字克明蘭陽人也弱冠舉於鄉授澧州知州
禮讓喻俗不規規於簿書期會之間一郡盡化之
化七年茅岡宣慰等土夷乘劉千金之亂出沒剽

每過州境戒戢儕類勿有所犯其感革強暴類此州俗女子年踰三十始嫁愚擻屬邑俱宜依期婚娶其貧不能舉者亦宜設法資之一歲中完娶者二千餘家巡撫都御史吳琛聞之以束帛勞異罹外艱歸服闋改知晉州值歲凶愚賑飢恤匱不遺餘力是年大水復至愚乃上疏言春秋傳曰大水者陰氣盛也今歲雨水爲害得無陰氣使然乎嘗觀唐史太宗因旱出宮女三千人我朝英宗皇帝卽位之初亦出宮女三百七十人伏望援古人已行之蹟酌今日時制之宜稽察宮女年貌老弱量爲節減務使在內在外

人人得所則陰陽和暢神人胥悅而天變可回疏入
純皇震怒逮繫京師頃之 上感悟詔釋愚出宮女
五百餘人愚既還職益自振勵會妖賊桑冲作亂愚
以計擒之 上嘉其能特令榜諭後數年致仕歸于
鉉內黃知縣愚卒六十餘年提學副使朱公大器始
祀於鄉賢祠

李惟聰

李惟聰字自愚杞縣人也身長七尺力舉千斤善躍
馬擊劍性直氣猛趨義若奔甘淡服勤避汚如不及
夜誦畢則入空室習劍懸枕作壘爲攻擊之狀讀

兵法有妙悟成化乙酉舉于鄉後屢上春官或獨行
無僕荷杖跨驢惡少駭散丙午選邳州知州河豬荒
田相地勢之宜走潦開渠抽棘辟畝歲入倍常流民
復業蝗不至境上官驗而稱之弘治壬子河決黃陵
治河大夫劉忠宣取以供事作堤延袤六百里以四
十日奏功晉工部都水郎中改繕部採木湖南庚申
北虜入寇大同兵敗晉山西按察副使大同兵備比
伍精閱拔十抽一制兵長短互用馬步錯行晝則治
武夜則固壘自率三千與同辛苦又修邊城皆十里
一壘中舍小壘大壘各有守兵由是士躍馬騰烽燧

不舉又三年改山東副使管遼陽屯田權貴皆受約
束又欲倣古井溝遂畝澮暇則便耕作警則阻馳驟
值改官不果正德丙寅又以急命往宣府飭兵虜畏
而不敢至年七十致仕歸

黃傑

黃傑字士英涇川人成化丙戌進士授濟南推官數
決疑獄民敬信若神明樂陵妖民李氏以左道惑衆
監司檄傑捕之獲其渠魁所蔓連悉火其籍置不問
一方帖然尋以治最擢監察御史視陝西戎政歷按
兩畿鋤強剗弊風紀肅然爲中官所誣下獄旣釋遷

順天府丞未幾出知肇慶府傑雖左遷無怏怏意
方撫字羣徭咸戴之弘治初百度一新改知慶陽遷
陝西叅政入爲順天府尹陞戶部右侍郎傑旣進卿
佐益留心政務慎出納杜請托未嘗少忽 上甚倚
任之無何以疾累疏乞歸 命方下卒于官

王繼

王繼字述之祥符人五六歲卽能誦詩讀孝經十六
補郡庠生成化丙戌舉進士後監察御史出按山西
刺舉不避豪貴數平疑獄境內肅然遷陝西僉事轉
固原兵備副使尋擢山西按察使時中官將命來採

石膽於紫碧山求之無有甚爲民患繼乃取小石子
給之中官怒曰石膽載諸古書何以爲無繼曰麟鳳
皆古書所載今有之乎乃上疏言其妄得寢再遷山
西右布政使弘治初福建江廣流賊起拜右副都御
史督兵往勦事平移鎮甘肅時哈密忠順王爲土魯
番所滅據其土地繼訓練士卒丕振天威士魯番來
附繼乃議取故王從子陝巴襲封 上賜白金文綺
以旌之召爲兵部右侍郎改戶部秩滿晉尚書嘗盤
詰太倉得羨金十餘萬悉疏以進其廉類此項之闕
人李廣事敗言官請並治大臣與廣交通者 上有

不問明日早朝空班謝罪惟繼與馬文升不與
益重之改南京刑部尋改兵部尚書叅贊機務卒于
官贈太子少保

高崧

高崧字鍾秀襄城人成化丙戌進士授南京大理寺
評事歷福建巡按僉事初入境會汀漳盜起且盛夏
瘴方熾同官皆憚行崧獨奮然往盜竟平身亦無恙
任滿奏績京師過高郵湖值暴風崧焚香祝曰吾平
生有欺心事或舟中有非義財富岸家溺歿不然何
憚我如此耶言訖風息復任副使再陞按察使多

釋疑獄弘治初貴州苗起以崧爲僉都御史往撫之
未幾卒于官崧居官三十餘年而家貧如故歿之日環
堵蕭然

李景繁

李景繁字邦泰儀封人也幼而好學器度不羣成化
五年舉進士授陝西三原知縣三原多大商鬻販淮
揚間貲累數萬每婚喪費千金景繁禁之使如制逋
民歸者復其田廬歿者給以棺屨數年稍遷太僕寺
丞改工部營繕主事二十三年遷虞衡員外郎尋轉
都水郎中管漕河時漕塞自儀真人淮凡三百里舟

膠不行有 詔命都御史暨郎中治景繁獨任之募
夫八萬人初濬邵伯湖楊子橋三汊河次濬朴樹灣
次濬儀真瓜洲二壩行瓜洲堤上見東南多沮洳區
問土人此何所也曰江潮之匯也景繁導之自古割
港劉家灣入漕渠土人曰河亢而江下非壩障之則
河水悉倒流入江漕渠益淺都御史而下咸謂李策
非善景繁曰江水故平潮至則悍激耳潮退水亦易
制也遂下令有司具土暨石潮至大決壩開江水奔
潮水聲洶洶如雷景繁乃塞壩閱數日會大雨漕渠
水瀰瀰襄岸舟乃大行河經徐州盪州將嚙居人震

恐景繁又作石堤河不能爲害弘治六年遷山西右
叅議督理糧儲景繁行塞上十年而餉運不闕擢四
川右叅政以疾乞致仕歸

楊謚

楊謚字文寧儀封人成化五年進士授直隸崑山縣
知縣以治行卓異擢浙江道御史院長以謚練習憲
體委掌諸道章奏九年秩滿陞太僕寺少卿未幾轉
大理寺右少卿復進都察院右僉都御史奉勅巡撫
宣府召回理院事會工部缺侍郎廷臣以謚請而諸
御史奏留之不果遷左副都御史尋陞兵部右侍郎

以疾乞休不允時北虜寇邊命謚選京營軍馬竟以疾卒賜祭葬如例謚爲人端慎平易臨事未嘗近名而名亦隨之嘗巡按浙江爲士大夫所重宣府屯田多爲勢豪吞占謚悉以法清出之得地千餘頃撥軍佃種歲收米數萬斛嘗署院事憲度肅然及爲侍郎悉心贊佐不激不隨士論重之

楚麟

楚麟字文祥密州人成化己丑進士授禮科給事中彈劾不避權貴上賜勅以獎之後以忤用事者謫永平同知陞陝西叅議分守漢中兼兵備兩地咸有

異政得民心俱祀于名宦祠云

人物考卷之八十六目錄

河南開封府三

丘璐

陳瑗

賈定

劉璟

楊璉

魏璋

李環

杜明

孫春

康厚

張泰

劉忠

杜忠

郭緒

李滌

張賢

王鵬

楊璉

劉道立

夏塘

李鉞

附子惠

李源

賈詠

許廷光

王廷相

田汝耕

陳溥

劉昂

高魁

王翊

劉大謨

張文魁

郭維藩

張原明

時植

張漢卿

本朝京省人物考卷之八十六

河南開封府三

丘璐

丘璐字仲玉蘭陽人布政陵之子成化己酉中鄉試
壬辰登進士第乙未授南京吏科給事中己亥連丁
外內艱壬寅終制起爲南京工科給事中丁未遷陝
西布政司左叅議奉勅督理甘肅糧儲弘治辛亥
還司乙卯遷山西布政司左叅政分守大同府戊午
還司以病卒于官得年五十有七璐賦質沉靜加以
自少家庭涵漬無統綺傲放之習又素富墳典博探

廣覽餐寢俱忘穿冗古今貫絡百氏雖僻書隱事雅
號洽聞者第髣髴崖略而已璐或觸其端輒歷歷舉
數百言不遺一辭其博學強記如此歷官中外幾三
十年其建白施設多上當 君心下達民隱在南京
前後疏二十六事剴切明暢甘州先聖廟春秋祀奠
惟奏俗樂以爲褻遂飾廟貌繹雅音金石絲竹之器
多自考定禮樂用諧神人胥悅肅州隣極邊璐以戎
主速壇阿黑麻戕殺哈密都督罕慎遂經畫調發築
苦峪城且徵苦峪赤斤蒙古罕東等衛頭目愛馬等
詣肅州宴嘗撫諭及安插哈密殘破夷人都指揮阿

木郎等一千員各給與農具牛種夷人用謚 朝廷
寬西顧之憂內地停輓輸之勞生平所與交皆天下
名士死之日家無餘貲歸無室處人尤以是高之

陳瑗

陳瑗字大玉別號朴菴祥符人幼而奇穎天順己卯
年十八遂領鄉薦成化壬辰登進士丙申拜戶部江
西司主事丁父憂免喪復除本司丁未擢廣西司員
外郎弘治戊申署山東司郎中在戶部最久以清慎
著聞時廷議鹽法久壞請遴選部屬有才望者清理
之部尚書舉瑗往治其事瑗搜剔弊端權貴人侵奪

鹺利者始皆知畏畿內大水敗禾稼奉詔賑救饑民
獲免死徙事竣陳言十事其間言權貴人役民之害
尤切時弊由是聲名益譟辛亥擢江西左叅政在任
五載悉心政務適建親藩規畫適宜省財力鉅萬丙
辰擢福建右布政使事有利病當興革者瑗必與同
官商確次第舉行不肯專主嘗恠文移亂真者猝不
能辯一日廉得僞印十餘顆皆老軍吏爲之擒其人
悉寘于法閩城中有渠通潮汐縱橫如井字形堙塞
六十餘年建議浚之伐石甕堤十餘里舟楫通行物
貨易致至今民以爲便丁巳轉江西左布政使父老

遮道迂之喜曰是故陳叅政耶下車卽除民疾苦數
事先時有橫取者爲委曲裁處上下無怨且謂累歲
盜賊不息實因民困征輸所致均其賦稅民賴以甦
戊午擢右副都御史總督南京糧儲出納月以數萬
計江浙湖廣例有方面官部運或不時至移文促之
俾如期集自京衛烏龍潭至江北鳳潁諸倉創置歲
久舊制特設工部主事一人專理修葺顧工役苟且
隨復損壞至則親爲料理視如家事又重建若干楹
皆堅固可久實有裨 國計云庚申卒於金陵官舍
得年五十有九

賈定

賈定字仲一別號一菴通許人格之仲子幼耽書有自得之趣成化辛卯舉鄉薦乙未丁外艱戊戌登進士第庚子出刺絳州絳人有屠者偕侶遠出拉諸谷中殺之將私其妻不可又殺之乃鬻其女以逸事久不明定根株其實誅屠者辛丑大饑疫叅酌古今爲救荒八事行之悉驗總賑少司寇何公喬新大加稱賞下其八事於列郡利濟甚博晉地宜棗約絳人饑不得伐棗棗熟饑者仰之何公始入疆問曰絳棗何以獨完民曰使君有約弗忍違耳垣曲絳屬邑有寇

聚山澤乘其新合遣健徒雪夜急擣之獲其魁復從
平陽太守李公琮入山撫其餘黨悉委仗卽農初饑
民棄子女轉死溝壑日遣人伺諸途聚而養之凡所
活數百巡按御史宋公德閱視各有餅餌在握歎曰
民之父母固如是已弘治戊申丁內艱歸暇日編緝
守令政規庚戌復除易州易多山近畿內饗薪蒸所
出經樵百年山童林空乃爲立良法民以不罷永樂
初始建北都民有獻棗栗者久之歲以爲常乃列園
林登耗之狀以聞得減其半甲寅以考最擢山西按
察司僉事適巡撫都御史張公敷華訪時政定曰如

高平繫逋者田業已盡淹械園土中永無出期不若
通簡邑民物其丁產稍殷者俾十分出一分償之又
欲令州邑簡其民淑慝之泰甚者識以善惡二籍歲
終則勾稽其實而誅賞之又言山西統屬視他省爲
少而晉代潘封國在焉椒聊日滋祿徵無極彼解澤
晉寶與穀同利三藩之祿盍併鹽粟均輸爲便多見
採錄丁巳正月卒于官得年五十有一

劉璟

劉璟字德輝鄆陵人生有異質弱冠補學官弟子自
同邑司徒張公謝政歸一見器之曰公輔器也他日

名與位當不下我東吳劉欽謨時提督河南學政試
居優等當廩以讓同學之貧者曰助之養也成化十
年舉於鄉明年第進士試政刑部當外補司寇林莊
敏疏留本部理刑授主事十九年陞本部署員外郎
慮囚江南多所平反又明年署郎中克副使冊封

蜀府二十二年陞松江府知府洗手奉法督率吏民
勤職業勸農桑修水利敦士習舉人宋論凶戾殺人
前守莫能治立置之法豪右斂迹海上有城隍威靈
太守廉明之謠郡人張某嘗爲鄢陵學諭璟所從受
業者致仕家居非公事未嘗一至郡齋常躬候之問

政有疾斯夕往事自進湯藥比卒爲持心喪其舊第
久鬻於人出俸金贖歸其子松人至今兩賢之丁外
艱改太原府惠綏窮民如在松江時再期陞四川叅
政漢州屯軍殺人爲亂巡按御史欲調兵勦之璟曰
是不可激親往招諭之首惡就擒亂遂定以內艱改
山西隨御史按澤州宗室有訴州守者袖刀截耳以
脅御史衆皆走避璟挺身入諭以理法引臂出之血
流其衣聞者壯其義陞山東右布政使正德元年轉
左薊剔宿蠹御史嚴而賦民寬部使者交薦之明年
擢右副都御史巡撫宣府事事務存大體罷諸苛細

條貫人以爲便賜金緋衣一襲勞之未幾名爲刑部
右侍郎大同人有訴將官不法者 命璟往勘奏復
稱 旨四年轉左尋階尚書時逆瑾專政毒流縉紳
璟委曲調護裨益亦多五年以寧夏平加太子少保
廷臣會鞠逆瑾有微斥瑾者輒反辱璟厲聲叱曰朝
廷有大法在尚爾私對邪次訊諸奸惟允 上方大
用而遽以老請得 俞旨乘傳歸歲役有隸月餽有
廩歸則自扁其所居之堂曰怡閒因以爲號與親舊
日觴詠相樂也七年流賊之亂燬其廬誥勅俱焚命
補給之仍優卹其家 世宗馭極覃恩進階榮祿大

夫十一月十六日晨興忽焚香危坐命長孫塔程侑書遺言教諸子勉爲忠孝不及家事書已就枕如安寢者明日遂卒固無他疾也得年七十三計聞命禮部諭祭者再工部治葬事

楊璉

楊璉字用章祥符人也成化十一年進士授丹徒知縣會中使如浙所至縛守令置舟中得賂始釋將至丹徒璉選善泗水者二人令著耆老衣冠先馳以迎中使怒曰令安在汝敢來謁我邪令左右執之二人卽躍入江中潛遁去璉徐至紿曰聞公驅二人溺死

江中方今 聖明之世法令森嚴如人命何中使懼
禮謝而去雖歷他所亦不復放恣云牟都御史按部
丹徒以索饌器不得誣以它事免官璉奏辯得白擢
南京監察御史郎中李諒以事謫靜寧知州持尚書
黎淳陰事率家人竊取公帑物淳不敢詰璉并劾罷
之給事中某等言事忤旨衆懼禍出叵測璉疏救乏
曰諫官乃 天子耳目若以盡職獲譴則天下事誰
復敢言者是 陛下自塞其耳蔽其目也奏入 上
悉宥之總制兩廣都御史秦紘劾安遠侯柳景不法
諸事勘實得旨景罷紘亦致仕璉奏曰景之罪旣明

是絃之劾不謬也今俱免者何也且絃忠實有大略
不宜擯棄從之隨起絃爲戶部尚書璉又奏建宗忠
簡公祠於丹徒如岳忠武杭州故事給卒守墓春秋
祀饗 上俱如所請云弘治初擢山東按察僉事以
疾卒年四十九所著有絃齋藁數卷

魏 璋

魏璋字廷圭鄆陵人成化乙未進士除武進知縣擢
監察御史彈劾先貴近而次權要巡按廬鳳淮揚奏
開古芍陂溉田惠民陞大理寺丞以直道忤時左遷
九江府同知致仕

李環

李環字佩德祥符人生有至性壯而學以躬行爲務
舉成化丁酉鄉試授廣平推官以父憂歸起補延平
決獄無留民亦孚其德而重犯法會大疫延平守死
環署其事沙縣民胡天秀者殺人亡命因爲亂環募
壯士捕之且喻來附者得宥其死不旬月悉平居九
載遷青州通判督糧儲時山東盜起又歲凶民無所
辦租環乃以官藏金克其糧數約民徐徐償之事聞
有詔免民償藏金于是民懽然歌頌其惠當事者欲
大用之環固請老歸卒于家子士允工古文辭舉正

本朝分省人傳表 卷八十一
德丁丑進士仕至陝西苑馬寺卿

杜明

杜明字文昭河南祥符人也姿貌俊偉司寇金堂杜公銘爲郎中時以公事至汴見而異之時貧甚顧刻志讀書靡間寒暑兩肱當几處木爲之穿由是業益進領天順壬午鄉薦成化戊戌登進士拜禮科給事中封駁克慎有聲諫垣維時陝西甘肅洮河岷州等處邊儲積弊滋甚奉 聖書稽察之乃會同巡按御史徐舟暨陝西藩臬二司自成化十三年以後各倉場糧芻一一盤驗洗姦剔蠹風采凜然凡黜而罪者

若干人人不以爲刻成化末言事者尚細故多被遣
謫明掌科事最久多所建白務持大體善類倚賴之
丁未春天下諸司例朝京輦首倡大班舉劾來朝官
丰儀音吐動人 憲廟簡注遂擢通政司右叅議弘
治辛亥轉左叅議壬子擢右通政出納惟允聲稱藉
甚朝著方留以柄用忽遭疾不起得年六十 上聞
訃遣官諭祭有曰方當大用胡遽云亾蓋深惜之也
明重厚端慎能急人之難鄉人凡以事至京者有所
控告必盡心爲之所無不感悅而歸初娶劉氏貌甚
寢親族多不堪其配至有勸遣之者禮之終其身不

使尋轉左御史陶煦言其事體練達才識老成將三載陞應天府尹歲餘言官以浮論中之遂具疏自陳始末懇乞致仕時年已六十九矣疏請老還汴治城南草堂集鄉里諸耆艾爲會日巾車往來觴詠談笑其精明剛大之氣老而不減云平生不蓄姬妾壽七十有四

康厚

康厚字本淳河南祥符世家也少岐嶷不凡苦心舉業弱冠領成化甲午鄉薦登戊戌進士授丹陽尹時父已致仕里居乃迎父就養父日訓以守官字氏之

要服行惟謹在任凡四年以寬平見旌擢南京監察御史出按江西九江直隸鳳陽諸郡監督商稅軍儲風裁峻整所至肅然父憂守制復除南京御史乙卯監應天鄉試察知弊端綜覈嚴密夙弊一清在南臺前後八年著清白之聲丙辰擢知溫州府溫僻在海壖軍民雜居號難治蒞以清簡郡人安之又更張蠹民者十餘事人皆稱便爲政雖尚寬恕及臨利害則毅然不可奪故溫之三衛二十三所素恃伍籍黠悍皆畏憚斂戢構戲綵堂於宦邸迎養母孺人卒去任百姓遮道挽留號泣羅拜服闋改除順德知府時父

母俱逝乃迎伯兄於宦邸祿養鄉人賢之順德故衝
要郡歲且饑民多流徙極力賑卹存活者甚衆大理
寺丞海陽吳公以督理賑事至乃歎曰賢哉守乎真
無愧古循吏觀風使者累薦可大受癸亥奏績銓曹
書上考當遷引疾乞骸骨不允還郡復上章懇辭允
之正德改元詔以禮致仕者進階一級應詔進亞中
大夫築晚節亭於後圃藝花竹與里中諸耆舊招邀
飲宴以太平庚午病卒年止五十有六

張泰

張泰字世亨祥符人器資英邁自少卽留心天下之

務成化丁酉領順天鄉薦明年戊戌登進士第試政
兵曹己亥授山東鄒縣知縣政尚仁恕六載績聞召
補省臺適罹內外艱守制還服闋拜陝西道監察御
史初監河東鹽課有勢要撓法爲奸上疏劾去之嗣
按蘇松常鎮四郡憲度峻整豪強斂迹時漕堤爲居
氓蟻聚其上五六百家歲久爲定業河漸淤塞廉知
其事奏徙而之他漕運通利再巡按山西劾貪酷吏
若干人軍民咸稱快焉在內臺滿九載擢陝西按察
司副使奉璽書整飭洮岷河州等處兵備踰四年擢
本司按察使明年擢山東右布政使尋轉陝西左布

政使老成練達士論歸之未幾擢右副都御史巡撫陝西陝西之地官遊最久熟知利病乃掇軍民困苦者十餘事嚴列條約刊布郡邑關中至今頌之踰年改大理寺卿時逆瑾用事以剛直忤瑾免歸亾何瑾誅復起爲刑部左侍郎擢右都御史開府固原總制三邊軍務感上知遇拜命卽行至鎮則選易將官振厲士氣一新攻守之具疏凡百數十上皆見嘉納奏捷者十有二璽書褒獎盡心籌邊寢食靡寧竟以勞瘁成疾亟上疏乞骸骨命未下而卒得年六十有二計聞賜葬祭贈太子少保刑部尚書子焯以功厝

錦衣千戶秦沉毅有大略平生不立崖岸與人交坦
直無偽善飲酒多而不亂其爲鄒縣令洮岷兵憲二
地皆有去思碑今三邊將士猶有能道其經略之蹟
者

劉忠

劉忠陳留人成化戊戌進士授編修累進學士爲日
講官是時逆瑾用事惡忠于講筵指斥近倖授意吏
部陞南禮部左侍郎尋遷尚書改南吏部當時宦遊
官視南爲閒散多務苟容忠獨毅然持風裁庶僚秩
滿署考必當其實有御史素恃勢驕橫郎中爲瑾黨

私昵者皆直署下考無少徇 毅皇帝念潛邸舊臣
名還爲吏部尚書兼翰林學士專理制誥瑾終銜之
兩引疾乞休不報瑾誅始名入內閣未幾以寧夏叛
逆平加少傅兼太子太傅尚書如故又以持正守法
不合于張永頃之主考會試左右有指摘試錄中訛
舛字以白上忠聞之卽日陳致仕不許乃以展墓請
報可特令乘傳歸旣抵家疏再上始許致仕仍給月
廩歲夫終其身錄一子爲中書舍人 世廟嗣位臺
諫屢薦不起遣行人存問復廕一子爲中書舍人詔
有司時致問未幾以疾卒計聞賜祭葬贈太保諡文

肅忠寡交接慎許可歷事兩朝屢見阻于權奸而志節終始不變云

杜忠

杜忠字世臣河陰人登成化戊戌進士授新城知縣多善政擢監察御史歷按兩畿出爲平陽知府值歲凶忠竭力撫綏至捐其俸金以賑之累遷副都御史巡撫延綏卒于官忠精敏持正所至卓有政聲逆瑾專政不少阿附故老于邊陲士論惜之

郭緒

郭緒字繼業太康人生七年父母繼沒祖母王撫教

之幼端簡沉默勤苦自勵閉戶不出遇歲歉嘗以所得廩米分給族人與人接莊不可犯成化庚子舉于鄉明年辛丑聯得進士觀工部政有事楚府却贖饋楚王賢之既而授戶部主事嘗督運銀二十萬兩于陝西既給軍而主者以羨告曰羨以正支法也歸之藩司弘治戊申陞署員外郎監水次倉者再監馬坊倉者一皆以廉謹聞癸丑陞郎中奉璽書總儲宣府宣府諸鎮歲用糧草不下數百餘萬每招商則奸豪蟻聚時有持都臺某書謁者叱不得售戊午陞雲南布政司叅議雲南去京師萬餘里僉謂非宜口分也

過家置妻子獨行抵任日事事不弛鶴慶地山水暴發漂流廬寨見途號者哺之野暴者瘞之大理蒙化諸土官侵賦銀數萬蓋久且隱訪而追之其分守所至克殄久叛巨盜楊才輩數十人先是迤西有夷曰思六越金沙江界據地千里積二十年拒不受撫至辛酉歲勢益猖獗鎮巡合議以勦請事下公卿議撫之便 孝廟重用兵從之詔與按察副使王同行旬餘抵金齒盧叅將和統軍距所據地二程許而次遣官持檄往者皆被留不報盧還軍至語其故且戒勿迫緒曰吾受國恩報稱臣在此如公言若臣節何昔

蘇武入匈奴十九年尚得生還况此夷非匈奴比萬
一不還亦分內事也或謂曰蘇君以黑髮去白髮而
還君今白矣將以黑還乎正色不答單騎從數人行
旬日至南旬巖突不可騎乃斬荆徒步繩挽以登又
旬日至一大澤憂都土官以象與乘之上霧下沙晦
淖迷躓而行愈力又旬日至孟賴去金沙江僅二舍
芟次手爲檄遣官持過江諭以 朝廷招徠之意夷
人相顧驚曰中國官今亦至此乎卽發夷兵率象馬
數萬夜過江抵其所持長槊勁弩露刀環之數重有
譯者泣走報曰賊刻日且焚殺奈何久此日爾譯雖

微亦世受國恩不以死報乃爲間邪因拔所佩劔指
示曰明日我渡江敢復言者斬衆皆股栗因賦詩見
志思六旣見檄諭禍福明甚又聞其志決卽遣酋長
數輩來請聽令及餽土物供具悉却去之乃奉宣勅
榜且與語云云大略先叙其勞次伸其寬然後責其
叛罪思六等聞之皆俯伏泣下請歸侵地緒曰此固
我 聖天子意也宣言許之皆稽首稱萬歲歡聲動
地因詰盧叅將先所使人出以歸之盧曹得報馳至
則已撤兵歸地受緬書矣是夏五月歸至會城鎮巡
以下皆極稱與鎮巡以狀聞詔予奏事者官一級餘

功伺覈以錄僉謂且有殊擢越三年考六年績僅陞
四川督儲叅政松建爲蜀極邊內地轉輸勞苦備至
率數石而致一石建議歲糶米價銀往令以半糶而
存其半貴則米賤則銀惟時酌給省費而便行之又
一年正德丙寅始以雲南功加俸一級丁卯進萬
壽表至京師因請致仕歸明年戊辰以疾卒年六十
有四所著有學吟稿撫夷錄藏于家緒忠確簡儉孚
於家達於政臨事不避意氣壯偉有如金沙之行非
智勇天植能當此而不縮慙者乎

李 濂

李滌字宗禹祥符人也早孤力學美鬚眉儀觀豐偉
侷儻有大節舉成化辛丑進士久之拜南京戶科給
事中會 敬皇帝初卽位是歲六月朔日有食之上
疏勸 上飭躬修政以銷弭變異因陳慎始保終之
戒 上嘉納焉都民當供雜調者其高貲富人大抵
爲貴勢家私役而官中百需特倚辦下戶滌令所司
覈實而均其征有挾私干請者痛斥絕之於是宿弊
盡蠲上下稱便中貴錢寧素饜諛時典畱鑰兄弟爲
姦利暴橫都城中乃奏劾其罪狀又論刑臣不宜干
紀與政辭指尤峻切用事者怒俄有盜取土於 孝

陵壩中者廉得其主名以聞用事者因指摘以爲誣罔非所宜言有詔鐫一階補肥鄉丞肥鄉小邑去京師差近朝貴往來境上每有所發取守令不能距違至則一切裁之以法其後遂莫敢妄求皆曰無撓彼疆項丞爲也是時左降官多簡傲不省事濼獨盡心吏職推情與下先諭教而後刑罰民大信愛之惟恐其去也一日集數百人走闕下上書言願從 明天子乞李丞惠養小民書報聞而以母憂歸比居喪年纔五十餘遂無仕進意家居旦暮手一編絕跡公府部使者以下造門不輒見旣見語不及私所居湫隘

或請更諸爽塏者謝曰先人安焉余不足以嗣之余保此足矣巡撫都御史孫需陶琰先後列薦於朝使郡守丞卽其家勸之復出譬說良苦弗應旣而拊心笑曰此中乃堅過於石何可轉也因署所居曰石菴以著其志中貴廖鏜鎮守河南勢張甚箴視士大夫獨心敬滌間爲具名之時賓客滿坐待以舉酒不得已彊往酒一再行卽據席睡大鼾鏜慙顧左右曰李公老人也不勝柘杓矣少選起拭目理髯長揖徑去鏜惘然自失自是不復名也論者擬之宋廣平待王毛仲事云素輕財居官所得俸祿悉分遺族人未

營立產業既老益貧常飯脫粟猶時時弗繼獨居一
室土牀葦席而已然無不足之色遇良日乘小車從
子姓出游茂林廣野靡所不之意欣然樂也正德癸
酉年七十一乃終滌仕盛明之朝數上書顯譏貴勢
亦矯矯壯激矣其謫也非上意令異時復起必且
馴致尊崇而乃泯迹里間優游終老卽有力者虛轍
相援執志弗變方諸槐里令雖所遇不同而風操則
似之矣滌善書所爲詩文皆有思致有集若干卷藏
于家

張賢

張賢字堯臣別號任真子祥符人也母夜夢神人送袍笏金帶至其舍覺而生賢自幼聰穎過人務學勤苦每旦昧爽起朗誦經史竟日不絕聲夜則閉目默誦不近燈火或諷其夜讀曰吾見爲學者晝嬉游間輟而乃夜費膏油非徒欺人亦自欺已吾不爲也年二十五領成化丁酉鄉薦戊戌辛丑會試俱不第卒業太學甲辰中春榜出知山東之單縣時邑人有在京爲權要官者厥子暴橫里中強奪人妻女財產前令莫能制至則擒縛之榜笞無完膚竟正諸法邑內肅然將三載母歿守制服闋改知海豐僅八月父沒

守制還服闋改知山西之襄陵境內有山泉可灌田
久爲臨汾勢家所據襄陵人不得沾其利奪返之邑
人立祠祀焉弘治丁巳擢陝西慶陽府同知在任九
年興利除害不畏強禦法所當爲者生死以之人莫
敢撓都御史楊公一清周公季麟咸薦之乙丑擢四
川順慶府知府下車清理累歲滯囚囹圄空虛事干
權勢難詰者當道必以屬之亦不辭避分守張叅議
發贖罪紙下岳池縣製造川扇民苦于賠償聞知移
書已之宦怒中傷遂暴其事于巡按胡御史賜賜具
奏以聞時逆瑾用事傳旨兩罷之正德庚午瑾誅復

起爲山西太原府知府其至太原也躄直如在順慶
時虜犯太原居民震恐有陳憲使者同諸僚夜飲宗
室第單騎往叩門呼曰虜患孔棘非燕飲時也矧時
例有禁爲法吏顧昧之耶坐是不合于當道乃謝病
歸平生以輒熟諛諂爲深恥人有持詩文相證者賢
指摘瑕疵盡言無所諱人多怒而去曩正德辛未
在京邸汴舉子會試南省者幾四十人以爲舉業著蔡
咸誦場中作質之悉不許已而曰士貴實學諸君藝
未精何敢與天下多士角後生多罵詈之旣揭曉視
之果無一人登第者衆始服其藻鑑云里中爲語曰

不諛人張堯臣卒年六十有二所著有二渠巴語
名賢珠玉

王鵬

王鵬字萬里祥符人也成化辛卯領鄉薦卒業太學
弘治己酉授山東青州府同知奉兩臺檄催府屬歲
負花布數十萬疋時布價翔踊遣人買之德州諸郡
負省銀若干而獨先五府以完兩臺深加獎勞復言
府屬城壕外多餘地悉豪右私占乞委官勘報給民
耕種秋成官民均分足以濟民食而備荒賑於是通
行六府得地數十萬畝歲積穀數萬石再獎勞之公

丑以母憂去任士民父老擁泣攀留如失怙恃丙辰服闋補濟南府同知益勵操守奉檄預買戰馬事竣稱其居官廉慎幹濟得宜獎勞繼至俾署德州倉舊用木斛率大入小出虧折累民其害甚鉅乃取工部所發鐵斛比造木斛出入惟均奸弊一洗代日餘米銀八百兩貯於官癸亥以課最擢湖廣衡州府知府下車首詢民隱以洗冤澤物爲已任郡獄淹囚六百餘人皆數年不白卽爲申理犯大辟者復數十人察其多枉力言於恤刑廷評傳公習得平反者數十人獄幾爲空弘治乙丑 孝廟升遐進香至京師不說

者謀改他郡卽上章乞休下吏部勘久之不報再章
乞益懇乃得俞允致仕旣歸閉門掃軌不與人接嘉
靖戊子以疾終壽八十餘所著有洗冤叙述錄

楊 璩

楊璩字廷佩別號靜軒原武人甫弱冠提學陳公選
見而異之曰吾禮經有傳非子不可遂授焉成化丁
酉舉于鄉錄其經義一爲式屢試春官不第且親老
家貧諸兄相繼沒服田力穡以養其親暇日從事問
學至弘治庚戌登進士辛亥丁外艱服闋授兵部武
庫司主事改武選司辛酉陞車駕司員外郎奉命同

御史某汰京衛軍得避匿者萬人歸伍且上章劾私役者 上嘉納之爰著爲例乙丑陞武選司郎中奏行蔭襲嚴比試大司馬深器重之正德丁卯擢廬州知府至則壹以廉正御之郡有疑獄歲久不決親推勘得生者六人郡大疫請禱徧給醫藥活之若敦禮士夫勸課農桑甚得古循良之體庚午陞長蘆都轉運鹽運司運使署設滄州近京師商旅多豪右然鹽場有遠邇美惡凡場置一籌納竹筩中令各商以次出之豪右不便曰吾革弊耳權貴何卹焉由是鹽法大行壬申劇賊劉六等攻滄州急州吏失守督州民

諭以大義登城守之且伺間發礮矢以斃賊首賊乃
解去事聞 上賜旌獎是年冬滄州內變殺吏民劫
倉庫倉卒率市民力破而逐之先是有馬指揮者與
之善出白金二錠寄焉變後袍笏罄然惟馬金投破
篋中獨完左右欲私之叱曰是何言安可作此喪吾
所守癸酉年逾六十上章求退者三而銓部方錄其
賢勞得旨陞山東右叅政致仕優游林下十有三年
丙戌歲卒壽七十五性剛直善談論古今非其道義
不肯取與歷官中外循循簡朴澹無所好歸田閉門
靜坐飲酒彈琴無所干於人而人亦不敢干以私故

內外無間言焉

劉道立

劉道立字成已河南杞縣人成化庚子舉于鄉成弘治庚戌進士授朝邑令有刺客殺人而逃誣及無辜已成獄矣覆勘疑之忽若有神附耳言曰景陽殺人柰何冤及他人耶道立遣人密伺果得所謂景陽者一訊立服邑中號爲神明以治行最召拜監察御史立朝剛正挺直不圓時劉瑾虐焰傾中外獨毅然不屈每危言指謫卽以禍福懼之屹不動也巡按真定丰采凜凜墨吏望風解綬尋陞陝西僉事丁外艱歸

服除仍補陝西尋丁內艱復除廣西所至咸以剛正著聲而亦以不善俯仰遭人側目故百姓畏愛而當途嫉之未幾累疏乞休致歸歷官二十餘年未嘗移妻孥之任剛毅鎮靜易事難悅有古人風焉

夏一塘

夏塘字天美鄆陵人自少卽有志聖賢之學非其義一毫不取事親孝其父常病醫者云藥得斑毛可差塘求之弗得號泣欲絕有燕啣斑毛寘之几用之果愈人咸異之居喪不用浮圖一遵古制鄆陵之復行士喪禮自塘始舉弘治乙卯鄉試授署齊河訓導卒

于官生徒感其教祀于學宮云

李

鉞

附子惠

李鉞字虔甫別號毅齋祥符人氣宇恢廓不凡童稚時與羣兒游於市有行路僧見而奇之曰此子他日必大貴是歲始從師西社學提學副使天台陳公選閱視社學噐之遺補邑弟子負治毛詩有名中弘治壬子鄉試丙辰舉進士戊午選授山西道監察御史巡視中城權貴家有奸法者繩之不少貸辛酉勅理河東鹺政時鹺池苦潦悉令築防延袤數里而國課用饒安邑有疑獄久不決逮繫者若干人廉得其

情一言立決人以爲神鎮守官席寵毒民劾罷之比
代去民遮道流涕甲子出按福建監臨鄉試得人爲
多未幾以疾在告正德丙寅病痊改浙江道覈刷京
畿文卷時羣閹竊柄濁亂國紀會疏劾之乞盡除去
辭旨伉直尋罹內艱去繼外艱適逆瑾擅權惡鉞曾
議已乃誣以他事罰米五百石輸邊庚午免喪改山
東道亾何擢知鞏昌府蒞政寬簡期在不擾而已辛
未擢四川按察司副使值劇盜方四等嘯聚劫掠全
蜀繹騷巡撫都御史林公俊屬以督勦所向克捷斬
首萬餘捷聞璽書獎勵賜以金幣仍加俸一級甲戌

擢陝西按察使持憲嚴明獄無停滯未幾超遷右僉都御史巡撫山西兼提督鴈門等關自陝入晉道經河東父老羅拜馬前曰我公來矣先是守臣侵漁邊儲軍告匱士卒嗟怨至則釐革夙弊兵食克初將士樂爲之用丙子秋虜寇宜府出白羊口南牧鉞度宜大擁重兵虜必不利卽移檄山西崑嵐五臺諸郡宜亟爲之備虜果犯崑嵐密授之算斬首百五十級獲馬千餘匹我軍全師而還上嘉其功賜璽書金幣再加俸一級時中貴欲攘爲己功改捷大同鉞不之辯而給事中潘公塤爲之不平乃倡言于朝士論益

重之是歲山西有內寇武廷章等荼毒地方勒兵勦之旬日蕩平 詔加倖如前鉞疏辭且請老歸里溫

旨慰留丁丑擢兵部右侍郎尋轉左署掌部事奉

詔裁革武臣抑僥倖汰冒濫武選肅清嘉靖壬午春虜寇西陲號十萬飛檄告急遂以兵侍兼僉都御史行邊 陞辭賜麒麟服寶鈔仍發內帑銀四十萬給

軍需馳至固原虜勢方熾進薄城櫓時援兵未集危甚乃下令大開諸營門晝夜不閉虜疑有備不敢逼間用火砲擊傷甚衆虜引去 詔總制三邊軍務申

明紀律增築墩堡謹烽火嚴斥堠廣儲蓄選壯勇軍

聲大振踰時虜復深入平涼涇州放兵大掠人懷疑
懼鉞曰此成禽耳乃密命游擊將軍時臣周尚文等
分伏要害斷虜歸路我軍大捷斬首百八十級獲牛
羊萬計諸將入賀鉞曰汝知賀寧知憂乎虜性狠關
既失利必憤憤而復來延綏諸路宜有備虜果寇延
綏伏發邀擊之斬首百餘級或請以捷聞曰偶勝耳
惡足爲功鎮巡奏捷璽書嘉之虜敗衄遠遁 詔還
朝進右都御史總督漕運兼巡撫鳳陽地方冒暑南
下察其利弊而興革之救荒賑饑不遺餘力未幾召
還掌院事再引疾求去 上慰留之僅兩月拜兵部

尚書侍經筵兼提十二團營鉞感知遇修明戎政凡
邊報警急必審度事勢指示方略期於萬全不求近
功不徼小利尤注意邊將務在得人請謁者無所容
時部事叢委文移旁午皆手自裁削坐是過勞疾作
乃上疏乞骸骨 上遣中使存問兼賜羊酒而疾轉
劇復上章求去益切 上賜勅褒獎命馳驛以還比
行病篤竟不起得年六十有二 上輟視朝一日追
贈太子太保諡恭簡遣官護其喪歸葬子惠丁丑進
士官行人 武宗南狩以諫死贈監察御史

李源

李源字宗一祥符人成化丁酉鄉試第一弘治丙辰
進士歷兵部主事負外郎郎中值劉瑾竊柄怒源守
正不阿謫襄陽府同知瑾誅擢湖廣布政司右叅議
無何以病免歸源資敏學博尤長于詩成化間汴中
藝林以源爲首稱云

賈詠

賈詠字鳴和臨潁縣人初舉弘治己酉河南鄉試第
一丙辰登進士改翰林庶吉士授編修克經筵講官
詠儀觀秀偉長身玉立識者知爲公輔之器正德四
年爲纂修事忤逆瑾改爲兵部武選主事五年遷禮

部祠祭員外郎瑾誅還編修六年遷左春坊左中允
兼修撰九年轉侍講學士掌南京翰院十一年拜南
京國子祭酒故事諫官御史有闕選國子博士等官
克之而南監每不得選詠疏以南北一體宜遷擢以
勵其志 詔可之十三年轉北祭酒以父樂菴翁年
九十有五詠便道歸壽其親於潁上遂草疏終養而
父適以疾卒服除會 世廟登極擢爲禮部左侍郎
奉命詣承天恭上 皇考獻皇帝尊號賜白金文綺
嘉靖二年改吏部左侍郎三年兼學士掌詹事府事
專管誥勅纂修 武廟實錄克副總裁官四年晉禮

部尚書兼文淵閣大學士叅預機務實錄成加太子
太保武英殿大學士尚書如故五年復修 獻皇帝
實錄成加少保光祿大夫柱國屢被鞍馬金幣寶鏐
襲衣玉帶麟蟒飛魚之賜數 名見諮問平臺燕對
親灑宸翰賜詩褒諭詠在內閣端嚴持大體然數抑
貴倖如奏止中侍奪牧馬草場不得與貧民爭利勲
貴請薊州莊田復奏罷之皆以詠有古大臣風然當
是時方更化興治士皆喜趨事功好紛華而詠更講
德雅度挈綱整紀納之太和不爲聲聞其所匡維調
護甚多人不及知也要其悃幅誠厚卓然稱鉅人長

者而落落不苟合六年竟以老致仕雖不究厥施而
脫屣榮名田野咏歌有洛社之風焉詠性耿介初在
翰林惟扃門讀書不從同舍宴游爲文章醇雅暢達
無艱深險僻之語嘗同考會試主會試主應天鄉試
及武舉試各一又主考會試凡程文一出天下誦之
所取士徧列中外至今稱得人雖老猶著作不倦耳
日益聰明四方求文者踵至揮毫運思酬答如平時
居鄉謙抑真坦若未嘗貴顯者人稱爲篤行君子云
歸二十年壽八十 詔遣官存問加月廩歲夫又四
年丁未秋以疾卒年八十有四贈太保謚文靖

許廷光

許廷光字本謙河陰人弘治己未進士授兵部主事
改光祿寺丞時大官器用歲費不貲廷光擇其太侈
者請減之 上嘉納遷浙江按察副使梔源盜起廷
光且捕且招民賴以寧入爲應天府丞陞僉都御史
巡撫浙江改四川轉視漕運再撫雲貴而卒

王廷相

王廷相字子衡儀封縣人弘治壬戌舉進士選翰林
庶吉士時方有邊警閣試擬經略邊關事宜疏廷相
卽明指利害陳權宜振刷之策疊疊數手言當道者

況其有經濟才授兵科給事中父疾疏歸起復謫判
亳州陞高淳知縣授四川道御史巡鹽山東裁勢豪
私販之弊巡按陝西貪吏望風解去鎮守廖太監煽
虐關中廷相隨事禁革廖銜之會中官陷搆下獄謫
贛榆丞陞寧國知縣松江同知歷四川山東提學遷
湖廣按察使山東右布政尋陞四川巡撫覃威布信
撫輯有方夷沙保向信倡亂日久廷相往勦平之宥
降散衆夷境遂安陞兵部右侍郎督修邊牆尋 詔
還陞南京兵部尚書革內外守備各監局科尅役占
諸弊以魏國公守備年久宜如各處文武官推代奏

入 上遂更置陞都察院左都御史兵部尚書督十
二團營兼掌院事慎選差明憲體以臺政分條類奏
上允行考滿加太子少師其于營務修舉廢墜明
作士氣無敢私役科害者會吏部一考察京官兩考
察外官皆簡覈精當奔競斂迹辛丑罷歸抵家閉門
讀書對親友不言宦蹟時遊東園會客葛巾野服訢
訢焉廷相德罷弘粹氣稟剛大修身立學以聖賢自
期不事浮藻旁搜遠覽上下古今唯求自得無所循
泥灼見其是雖古人所非者不拘灼見其非雖古人
所是者不執立言垂訓根極理要多發前賢所未發

焉蒞官以忠誠事上以公直率下沉幾先物深毅必
謀期于有濟遇大事不動聲色處決自得其當事已
濟竟不言其所以尤善御小人雖秉道嫉邪無所假
借然不輕發必伺其便而決去之使不得逞人謂狄
梁公不是過也有家藏集若干卷居恒嘗自盟曰大
識者外僞不能累大氣者外侮不能動大德者外物
不能遷又曰權所以運國勢紀綱所以繫國脉人才
所以主國命故國之不亾者三權不下移紀綱不墮
不用小人以長國也又曰迂儒強執不識古今之宜
鄙儒依阿不顧國家之計俗儒淺陋不達治忽之機

皆不堪以大任數語真名言也有識者特書之座右

田汝耔

田汝耔字勤父祥符縣人弘治乙丑舉進士授行人
選給事中是時劉瑾竊政瑾誅闖永嗣其所行朝紀
聿紊官惟附權潤已汝耔挺立其間絕請謁攻詞賦
與崔銑交舊而雅好何舍人景明每過兩人浮白唿
詩慨時自憤曰引裾請劔者固丈夫許國應爾顧事
不當其會而請不中款殺身無益嗟乎迹與心違命
與世左每自悲感于懷耳汝耔遇事斤斤自信敢斷
行值端揆虛位爭進者汝耔上疏言當用大臣以忠

去位如韓文等遭旨斥然不禡職遷江西提學令
專江西士習諼恣尚請託提學官校士不合素所評
輒叟謹徑去善宦者先陰訪衆議叅以今試者列名
下之汝籽雅好秦漢諸家書刻行史記往以舉業譽
者汝籽病其腐置下列又遵 勅諭賢知府伍文定
同知曹琥四人及教官十二人及退居御史宋景及
逸士某俱上疏薦又劾知縣及校官不職者十餘人
憲臣及僚友惡其侵官乃共騰謗當考官時南臺劾
之調山西自山西遷湖廣副使皆理獄訟清屯田修
水利催度儲事靡不飭無何與御史言不合卽抗疏

自劾乞休還汴力田養母杜門誦讀聲琅琅聞戶外
病六經庸學傳註紛如字稱句品思纂輯成一家言
僅畢周易而已詩暨古文集若干卷弟汝棘以鄉薦
爲兵部司務詩文藻麗與兄並美焉

陳溥

陳溥字一卿鄆陵人弘治乙丑進士授大理評事以
忤逆瑾謫武鄉縣丞稍遷曲陽知縣瑾誅擢戶部主
事歷遷貢外郎郎中總理大同糧儲經制有方陞山
東右叅議守海石道值歲大侵溥冒雪賑恤全活者
甚衆因感疾上疏請歸有 詔進階

劉昂

劉昂字孟頴別號蘭谷汴人天性狷介與衆寡諧積學勤苦無間寒暑家固貧至昂益甚閉門讀書處之怡如也成化間都御史江浦張公瑄巡撫河南聞其名聘爲子師昂曰禮聞來學不聞往教辭不往提學副使天台陳公選聞而重之乃餽魯齋遺書爲力行之助復命生徒有器資者從之游昂以身爲教講究義理務使學者體而行之經指授者多爲名士累試場屋弗利年四十貢禮部拜內丘縣學訓導教士不倦三載罹內艱還汴服闋改授棗強縣學訓導啓迪

勤勵如在內丘時郡太守知其賢委攝邑符政令清
簡百姓安之日讀書堂上事鮮不辦弘治庚戌九載
秩滿考績京師乃上崇守令以安民崇儒重道二疏
爲當道所沮還歸旅舍擊缶歌曰職冷官微言語輕
不如歸去結鷗盟林間睡起三竿日且與兒孫樂太
平遂乞致仕歸築室於汴城之大寧坊扁曰書香窩
日吟哦其中賓客非其人不見命子耕讀種藝暇則
往視之習靜簡出歲惟二赴鄉飲而已所著有四書
粹議詩經直解蘭谷詩文抄椿庭遺思錄書香窩裏
吟若干卷藏於家正德丁卯卒年七十二汴人咸尊

仰之稱蘭谷先生云

高魁

高魁字文元新鄭人性仁孝有大節事親無惰容與兄弟居財貨盡以屬之成化丙午舉于鄉弘治末授金鄉知縣勤恤民隱罷不急之務作人崇化必自身始冬不爐暑不葢食無兼味一布袍九年邑士大夫信而服之爲立生祠擢工部主事歷郎中時逆瑾用事乃棄官歸卒于家子尚賢舉進士

王翊

王翊河南許州人正德三年知安平先是民多爭訟

邑令弗能折輒愬之府故府檄勾稽無虛日翊隨事
剖析迎刃而解曲中其情民自以爲不究府由是無
愬者而聽案晝寂雖隣邑求直當道亦往往乞下翊
其明斷類如此視學政久弛風化漸漓迺圖修舉自
堂齋號舍廟廡門垣次第加繕自敎事常規外別爲
私程以課進修政暇親爲解經日移弗倦而勸賞有
格供億有常士始知學邑有社學久爲人占翊復之
擇師以敎朔望考閱以勵勤志河間真定神武三衛
屯則在安平軍士相沿不奉約束翊以爲旣居吾土
不從吾敎可乎脫有他變責將誰歸因立屯長編總

甲以聯屬之申嚴其令俾不得肆有頑梗者卽經
以法辛未羣盜起畿甸攻城屠邑所至淫掠翊築堤
挑塹高城深池曲爲捍禦賊屢窺城以身督民兵奮
死守之卒保其城及擢德州守北行民遮道攀留悲
隨如失怙恃相與立去思碑

劉大謨

劉大謨字遠夫別號東阜儀封人明亮豁達髫年入
邑庠卽淬礪志節刻苦學問一時豪俊未之或先弘
治戊子薦於鄉正德戊辰登進士初授戶部主事督
收黃花鎮古北口清江浦諸地糧芻是時逆瑾擅權

扇虐朝士凡行役往還皆趨候伏謁冀免禍者 陛
辭卽出國門士論高之庚午改廣東道監察御史自
是風裁播中外矣辛未上疏勸學與政壬申巡按遼
東陳三事皆有關政體時太監岑章肆毒遼陽廉知
卽捕其左右用事者悉置之法章惶懼至誣讎以他
事逮繫詔獄遼士民奔走泣送先後相望於道癸酉
謫陝西隆德典史旋量移蒲城知縣旣至蒲日惟行
所當務蒲民頌德勒之貞珉丁丑晉同知鳳陽府會
大水檄委賑濟多所全活戊寅晉浙江僉事首革菜
戶於私衙旣而分巡金衢時宸濠構變乃勒兵常山

元聲四達兩浙賴以弗恐辛巳 世宗御宇入賀萬

壽晉陝西按察副使時總戎李隆者謀殺都御史許
公銘事久未決當路以屬謨竟正諸法輿論快之癸
未晉四川左叅政分守川南川東二道值番夷爲亂
督師征勦擒其元惡全蜀以寧事聞有銀幣之賜丙
戌春羅母憂戊子免喪北上時三晉大饑超拜右僉
都御史提督雁門撫綏山右卽上疏請出內帑溥賑
上可其奏遣官齋銀五萬入晉陽時方旱謨巡歷
所至問民疾苦齋沐虔禱雨旋澍民大悅會有議撤
備關官軍者抗疏止之先是父黎城翁垂白在堂嘗

乞終養不報既而糾劾叅議魏倫忤重臣意遂得致仕或勸之辯者笑曰老父在里乃今得遂侍養吾又何求况暇辯哉既歸與黎城翁怡愉終日每風和日晴卽約朋舊登高眺遠觴詠爲樂若將終身焉者自巳丑至巳亥數年餘南北大臣臺諫及撫按多所論薦由是再起巡撫川中其宣布朝廷德意獎拔廉平洗刷垢弊凡地方事宜罔不經理精密至於臍臘逼邇北虜堡屯曠遠舊設指揮防禦謂其未足以震懾之也具奏乞設守備施州地界川胡夷多肆行劫掠亦欲添設叅將疏入上俱允從壬寅奉勅諭條五

子以安邊禦虜又皆積有成效撫蜀凡四年澤被威
宣銓部屢擬入佐院事竝總督糧儲戶侍宮僚皆未
之授蓋廟建以材木爲急而川中固採辦地也癸卯
大木告完大司空奏薦資望獨深勞績爲最遂晉左
副都御史撫川中兼賜銀幣馳驅間關因感瘴癘邁
疾卒於官享年六十有八所著有東阜集若干卷藏
於家臺臣上其功蒙恩賜葬祭如制蔭其子爰爲國
子生

張文魁

張文魁字元甫別號字川蘭陽縣人方垂髫河決舉

家舟而覆恍有朱衣人掖之泊於林杪以免弱冠補
縣學生正德丁卯鄉試中式戊辰登進士授刑部陝
西司主事時權瑾流毒縉紳衆爭以苛刻冀自免魁
獨多平反人皆危之弗恤也旣而連丁內外艱服闋
赴部冢宰曰是權瑾時執平主事耶陞刑部員外郎
平反如主事時陞山西按察司僉事巡冀北道初大
同當權幸隨駕經過之後地方官緣爲姦利至是巡
按張侍御英檄往勘之乃按都指揮章傑宋文尅削
軍資十四萬褫其職竄巨猾陳萬寧於炎荒旣而督
修沿邊險隘身往臨巡嘗遇伏虜於橋頭堡以護兵

道前迫之皆遁去事聞賜帑金十兩陞布政司左叅
議復守冀北首疏宗室聰濶長史趙寬太監王哲總
兵楊玉數十家之橫罪其黨二百八十餘人權勢斂
跡覈追豪商蘇霑逋稅八萬餘金皇店李瑀逋課十
萬餘金克軍儲又閉大同關王廟以釐請罪之俗毀
藩府聖母祠以絕結緣之妖陞陝西行太僕寺少卿
大同副總兵以鞍馬金罷馳賀於陝曰吾不以易地
易介也郤之陞苑馬寺卿裁革豪強私買私賣之弊
馬政以清陞山西右布政使尋轉山東左使革堂食
裁冗費羨餘月計千餘金別貯以資海道備倭之用

適寧夏撫臣告缺陞都察院右副都御史建節朔方
虜三入指畫方略捕斬甚衆捷聞凡三拜白金文綺
銀牌之賜陞俸正二品嘉靖戊戌春虜困夏遊擊於
宴官湖得報自率大衆援之虜始遁因襲寒感疾力
求解任不允會有中傷者罷節鉞叅知行省政事力
辭以都御史致仕云既歸杜門謝客鳴琴賦詩時名
親故子弟能文者考德問業終日不倦偶晨興曰何
錦衣甲馬者克斥吾庭耶居數日乃卒年六十有四
計聞特遣賜祭葬生平聰察沉毅剛直果斷內行修
謹雖隆夏未嘗裸體晏坐盛怒未嘗撫案大叱嚴於

惡見吏之貪污者如仇讐然服善休休若已有之
陸太史鉞謂其氣清而貌癯身若不勝衣而剛中有
制至臨大事決大疑確不可移云

郭維藩

郭維藩字价夫儀封人正德辛未進士改翰林庶吉
士授檢討遷南京國子監司業未幾進侍讀學士克
經筵日講官每陳經義啓沃諄切一日講尚書天維
純佑命章末獻言有曰去躁急之習而崇敦大之風
上謂輔臣曰維藩意必有所指其使究言之維藩
乃上時務八事 上嘉納之未幾蜀撫臣獻白兔詞

臣皆獻頌維藩以爲非瑞獨不上頌有旨免歸尋
名還爲太常少卿兼翰林學士掌院事病卒上念
講幄積勞特賜葬祭益異數云

張原明

張原明字孟復儀封人也正德六年進士授刑部主
事歷陞郎中清嚴明慎江彬錢寧嘗以事謁原明悉
峻卻彬寧銜之十四年毅皇南巡衆情洶洶懼變
原明與郎中陸俸等合疏入諫意指近侍蠱惑上
怒罰跽門五日杖三十奪俸六月及彬寧事敗原明
補四川按察副使世廟嗣位旌其忠原明特加正

三品俸尋陞甘肅行太僕卿布衣張紳獻書闕下言
原明李時董玘輩宜屬以軍國大事不報後數年原
明累遷陝西左布政使以疾乞休詔進光祿寺卿孫
鹵舉進士嘗尹高平有卓異之績擢禮科給事中累
遷吏科左給事中所上數十疏皆切中時弊

時植

時植字良材通許人也植儀觀瓌偉少以志節自負
僉事賈定器其才以女妻之顧數試不第入粟補國
子生居常感激欲奮拔樹功名以見于世正德六年
春授四川梁山主簿潔身惠民聲稱籍籍時蜀寇肆

掠漢中東窺鄖襄西薄重慶巡撫都御史林俊率兵
討之檄植督餽饟數加獎諭會知縣闕且偵賊出沒
鄰境遣植還至則增陴浚隍廣儲待募勇敢泣盟于
戎曰國家承平日久民不知兵賊乃敢厲民違天天
必厭禍吾儕協心共濟懷貳者斬以徇人皆震駭用
命十一月二十八日賊薄境植先伏銳卒於多喜山
扼險要自營于蟠龍溪犄角以應是夜賊至乃大舉
火縱兵斬獲數十級餘遁去慮其復至乃於城周塹
原索石起戰樓於城上躬擐甲胄指使戰守屹爲保
障遣使請兵於俊賊騎斃于道不能達方南攻忠

州憤敗于梁也退合陳二兵直趨城下植繫印于肘
誓與存亾率衆死守梁城三面負山瞰溪西門夷坦
受攻以身當其危而南則義官曾明守之方寇進攻
植命礮弩交下遂少卻抵暮寇營于石馬山趨南城
樓墉墮圯曾先以貨賂賊得匿去植哭之曰天也遂
遣素倚信者取子寵以隨乃憑堦墉率諸吏卒固守
又二日方寇分翼夾攻復督壯士五百出墉力戰殺
數百賊踪血被道陳寇繼進悉衆合圍植知力不可
支乃左挈子右揮戈以蔽西門失守遂被執置寵於
地曰吾不忍汝生爲人奴死於人手欲刃之賊遽抱

子奪刀褫衣而灼其身植仰天歎曰嗟乎植蒞官不
九月而與賊拒者幾三旬外援不至民疲力殫矣汝
獨不聞檻蘭廷瑞于京師殲鄢本恕于襄陽乎方寇
壯其言曰汝健男子若能事我妻子當更完聚共圖
富貴植瞪目大數之寇知不可致命卒斫其肩顧印
在肘奪弗與因并斫其首以死時年四十有七方寇
以子昇一老嫗復資金帛曰善育之無使主簿無後
賈氏在官廨聞植既執經于別室賊至縱火大劫女
九歲哀母死趨火就焚後方寇入城令所部敢有殺
主簿家族者斬卒具實告寇嗟嘆久之仍令撲其火

而所經室巋然獨存越二日援軍始至植姪孫永壽
始來解賈氏訪求植屍初賊退醫秦覃購得之容色
不變昇至廨所同殮焉老嫗負子道遇其母偕至單
乃館穀于家事已巡按御史王綸疏聞詔曰時植贈
知縣賈氏貞烈可嘉女赴火死俱旌表仍廕子寵入
監所在給舟送歸葬後數年梁人感德建祠奉祀

張漢卿

張漢卿字元傑儀封人正德辛未進士授魏縣知縣
徵拜刑科給事中歷戶科都給事中嘉靖初議大禮
漢卿抗議謂上必當嗣孝皇疏再三上皆伏哭

于午門外 上怒杖于廷罷歸卒于家隆慶中 詔
追贈太常少卿

本朝分省人物考